

潮陽縣志卷之八

明中憲大夫前浙江提學副使預修 世廟實錄邑人林大春著

風俗志

伊昔世風靡不由醇趨漓即唐魏故都皆比屋可封之地也及至周之叔季遽變而為揚水之歌且不免於碩鼠之歎焉何者其末流之濫固所必至也乃唐有蟋蟀之良士魏有伐檀之君子此豈盡為風聲氣習所移者耶余邑去

帝鄉萬里雖非唐魏比然被化深矣方其盛時弦歌達于四境揖讓興於畔路盖其俗已近古如此抵

潮陽縣志

卷之八

乙

今則不能不變其初者豈其伐檀蟋蟀之風果爾盡亡患在無人以先之耳荀子曰儒者在位則善俗故鄭伯好勇而國人暴虎陳胡公夫人好巫而民淫祀言習漸也茲以今之習當反古之漸苟因其勢而導之譬如順風振鐸罔不響應矣顧余非其人也猶幸有在位之儒在焉則亦何敢不殫心以告作風俗志

國中之俗

惟縣廓之俗四民輻湊搢紳惟弁凡厥工商並殊鄉縣國鮮良醫家覓巫覡歲時伏臘釃酒烹鮮烝

昇祖妣旅集賔筵或有雲遊高談孔墨富室華宗
貴耳賤目來往招邀惟日不足亦有少年意氣豪
俠見事風生投機箭發訛言晨興樗蒲夜擲惟彼
人士洵羨且都口焉若訥身不勝裾習尚庶隅恥
事干謁氣類相師道德劇切一朝筮仕未及臚躋
片語不合脫屣如遺循循里門屏跡輿馬戴笠相
逢乘車亦下下及閨房織紵是常既精五飯載幕
酒漿恨不春蠶爰求柔桑

鄉間之俗

惟峽山至于黃隴爰及貴山同條共貫農士攸分

質文強半江口漁簑牛背牧笛歎乃相聞樵唱山
隔中有故家楊陳范蔡禮儀是敦賔主百拜暇日
登臨騷墨間作或仕或隱扣舷為樂

惟隆井至于舉練地產魚塩俗長會計一水之隔
鄉音各異宛彼中洲漁人所利高田弗雨水車作
苦海水飄流田禾半死風景不殊人才間出習尚
稍差文法是逐

惟竹山至于直浦地聯三嶼俗邇揭陽誰謂河廣
一葦可杭間有壯夫却敵百萬家住連村農行讓

畔矧爾詩書文光翰苑託隱逃禪咸登彼岸

翰苑
禪隱

事見列傳
并古蹟

惟砂浦至于招收地近俗殊砂產羨士招多健兒
賁海為塩下廣為生千頃霜飛萬斛鷗輕况復精
悍視死如歸環堵以居賊聞而悲惜哉靡常易動
難固惟有士者禮義干櫓習俗難移吁嗟砂浦

按邑之西北山中有曰輦戶者男女皆椎髻箕倨
跣足而行依山而處出常挾弩矢以射獵為生矢
塗毒藥中猛獸無不立斃者舊嘗設官以治之名
曰輦官或調其弩手以擊賊亦至然其俗易遷徙
畏疾病刀耕火種不供賦也其西南江上又有曰
蛋戶者岸無室廬耕鑿不事男婦皆以舟楫為居
捕魚為業舊時生齒頗衆課隸河泊近或苦於誅
求逼於盜賊輒稍稍散去或有棄舟楫入民間為
傭保者矣

潮陽縣志

卷之八

三

客有問於林子曰子志風俗而不及時序何也曰
時序所同也風俗所獨也曰何謂也曰獨生於習
習生於意同出於感感生於時者也是故晉人以
清明寒食然非獨晉也楚人以五日競渡然非獨
楚也此無它其時之同焉故也時同則感同之矣
豈如風俗千里異趨百里異嚮譬之人心不同有
如其面故君子靜以觀風動以觀變觀風可以知
治也觀變可以知時也故道德一而風俗同者上
古之盛也風俗雖漓而道德未衰者中古之趨也
若夫道德不明而俗頹焉風斯下矣曰然則而邑

之俗何以曰國中之俗純駁半也乃其重三加之儀嚴六禮之紀終三年之喪修四時之祀不可貶也鄉間之俗剛柔半也乃其盡親睦之恩敦守望之誼謁三時之勤慕四禮之制不可廢也曰其於道德也何居曰孔子曰齊一變至於魯魯一變至於道盖言禮教之為重也今邑之禮教既崇雖謂之魯亦可也然而魯之削也滋甚余猶懼夫邑之終於魯也